

**Ministarstvo pravde i uprave Kantona Sarajevo**

Na osnovu člana 22. stav (1) tačka d) i člana 23. Zakona o zaštiti na radu ("Službene novine Federacije BiH", broj 79/20), u vezi sa članom 55. Zakona o radu ("Službene novine Federacije BiH", br. 26/16, 89/18 i 44/22 i 39/24) i člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), na temelju Akta o procjeni rizika na radnim mjestima i mjestima rada u radnoj okolini, broj 030-25-APR/24 od 17.04.2024. godine, ministrica pravde i uprave Kantona Sarajevo donosi

**PRAVILNIK****O ZAŠTITI NA RADU U MINISTARSTVU PRAVDE I  
UPRAVE KANTONA SARAJEVO****POGLAVLJE I - OSNOVNE ODREDBE**

## Član 1.

(Predmet pravilnika)

Ovim pravilnikom se utvrđuje organizacija provođenja zaštite na radu, pravila prevencije i zaštite, poslovi s povećanim rizikom, poslovi na kojima se provodi mjera skraćivanja radnog vremena, način utvrđivanja zdravstvenog stanja radnika koji rade na poslovima s povećanim rizikom, i drugih radnika, sredstva i opremu osobne zaštite koja pripadaju radniku, te prava i obaveze i odgovornosti radnika za zaštitu na radu i drugih radnika u ovoj oblasti, kao i druga pitanja od značaja za sigurnost i zaštitu zdravlja na radu.

## Član 2.

(Definisanje pojmova)

Pojmovi i izrazi koji se koriste u ovom pravilniku imaju isto značenje određeno Zakonom o zaštiti na radu ("Službene novine Federacije BiH", broj 79/20) (u daljem tekstu: Zakon o zaštiti na radu) i podzakonskim propisima donesenim na osnovu tog zakona.

## Član 3.

(Rodna neutralnost izraza)

Izrazi koji se koriste u ovom pravilniku, a imaju rodno značenje, jednako se odnose na oba pola.

**POGLAVLJE II - ORGANIZACIJA PROVOĐENJA  
ZAŠTITE NA RADU**

## Član 4.

(Obavljanje poslova zaštite na radu)

- Ministarstvo pravde i uprave Kantona Sarajevo (u daljem tekstu: Poslodavac) samostalno obavlja poslove zaštite na radu na mjestima rada u ul. Reisa Džemaludina Čauševića broj 1, u kancelarijama br. 15, 139, 141, 142, 143, 149, 150, 307 i 322 i Obala Kulina bana broj 4 u Sarajevu, u kancelarijama br. 1 i 5, u skladu sa Zakonom o zaštiti na radu, Pravilnikom o načinu i uslovima obavljanja poslova zaštite na radu kod poslodavca ("Službene novine Federacije Bosne i Hercegovine", broj 34/21) i drugim propisima kojima se uređuje oblast zaštite na radu, i u skladu sa Aktom o procjeni rizika na radnim mjestima i mjestima rada u radnoj okolini, broj 030-25-APR/24 od 17.04.2024. godine (u daljem tekstu: Akt o procjeni rizika).
- Stručna služba za zajedničke poslove za potrebe Poslodavca vrši poslove obezbjeđenja zgrada sjedišta Poslodavca, kao i poslove održavanja i korištenja voznog parka, poslove protivpožarne zaštite, održavanja i zagrijavanja kancelarijskih prostorija, shodno Uredbi o

osnivanju Stručne službe za zajedničke poslove ("Službene novine Kantona Sarajevo", broj 31/23).

- Prilikom organizovanja poslova zaštite na radu Poslodavac vodi računa o broju radnika koji je utvrđen Pravilnikom o unutrašnjoj organizaciji Ministarstva pravde i uprave Kantona Sarajevo, ("Službene novine Kantona Sarajevo", br. 25/19 i 35/22), broju lokacija odvojenih mjesta rada, opasnostima i rizicima po zdravlje radnika.
- Pri obavljanju poslova zaštite na radu Poslodavac osigurava takve uslove na radu kojima se u najvećoj mogućoj mjeri sprječava nastanak povreda na radu, profesionalnih oboljenja i oboljenja u vezi sa radom i koji stvaraju pretpostavke za punu psihičku, fizičku i socijalnu sigurnost zaposlenih.
- Poslodavac ostvaruje zaštitu na radu primjenom svih mjera zaštite na radu u skladu sa opštim mjerama prevencije.

## Član 5.

(Saradnja sa drugim poslodavcima koji obavljaju djelatnost na istom mjestu rada)

- Poslodavac putem Stručne službe za zajedničke poslove saraduje sa drugim poslodavcima koji obavljaju djelatnost na istim mjestima rada kao i Poslodavac u ul. Reisa Džemaludina Čauševića broj 1 i Obala Kulina bana broj 4, Sarajevo, u cilju provođenja propisa o sigurnosti i zaštiti na radu, te će sa njima usklađivati aktivnosti u cilju zaštite radnika i sprečavanja rizika na radu.
- Poslodavac će obavještavati druge poslodavce iz stava (1) ovog člana o rizicima na radu.

**POGLAVLJE III - PROCJENA RIZIKA I  
UTVRĐIVANJE POSLOVA SA POVEĆANIM RIZIKOM**

## Član 6.

(Procjena rizika)

- Poslodavac je u skladu sa Zakonom o zaštiti na radu, Pravilima o procjeni rizika ("Službene novine Federacije BiH", broj 23/21) i drugim važećim propisima izradio Akt o procjeni rizika na mjestima rada koji sadrži opis procesa rada s procjenom rizika od povreda ili oštećenja zdravlja na mjestu rada u radnoj okolini i mjere za otklanjanje ili smanjivanje rizika na najmanju moguću mjeru u cilju poboljšanja sigurnosti i zaštite zdravlja na radu.
- Poslodavac obavještava radnike o rezultatima procjene rizika kao o mjerama i kojima se rizici otklanjanju ili umanjuju, a pismenim putem o tome obavještava zaposlenu ženu za vrijeme trudnoće i dojenja, kao i radnika sa promijenjenom radnom sposobnošću.

## Član 7.

(Utvrdjeni rizici)

(1) Aktom o procjeni rizika su na radnim mjestima kod Poslodavca utvrđeni slijedeći nivoi rizika:

| Redni broj | Naziv radnog mjesta   | Nivo procijenjenog rizika |
|------------|---|---------------------------|
| 1.         | Ministar  | Prihvatljiv rizik         |
| 2.         | Sekretar ministarstva   | Prihvatljiv rizik         |
| 3.         | Pomoćnik ministra za pravosuđe i izvršenje sankcija i mjera                 | Prihvatljiv rizik         |
| 4.         | Stručni savjetnik za pravosuđe  | Beznačajan rizik          |
| 5.         | Stručni savjetnik za poslove pravosudne uprave i izvršenje sankcija i mjera | Beznačajan rizik          |
| 6.         | Pomoćnik ministra za upravu   | Prihvatljiv rizik         |
| 7.         | Stručni savjetnik za upravu   | Beznačajan rizik          |
| 8.         | Stručni saradnik za upravu  | Beznačajan rizik          |
| 9.         | Viši samostalni referent za upravu  | Beznačajan rizik          |

|     |   |                   |
|-----|---|-------------------|
| 10. | Pomoćnik ministra za propise  | Prihvatljiv rizik |
| 11. | Šef odjeljenja za procjenu uticaja propisa  | Prihvatljiv rizik |
| 12. | Stručni savjetnik za procjenu uticaja i izradu propisa                                | Beznačajan rizik  |
| 13. | Viši stručni saradnik za normativno pravne poslove i poslove procjene uticaja propisa | Beznačajan rizik  |
| 14. | Šef odjeljenja za normativno pravne poslove   | Prihvatljiv rizik |
| 15. | Stručni savjetnik za zakonodavstvo  | Beznačajan rizik  |
| 16. | Stručni savjetnik za provedbene propise i davanje mišljenja na propise                | Beznačajan rizik  |
| 17. | Viši stručni saradnik za normativno pravne poslove                                    | Beznačajan rizik  |
| 18. | Pomoćnik ministra za finansijsko ekonomske poslove                                    | Prihvatljiv rizik |
| 19. | Stručni savjetnik za finansijsko računovodstvene poslove                              | Beznačajan rizik  |
| 20. | Stručni savjetnik za planiranje i izvršenje budžeta                                   | Beznačajan rizik  |
| 21. | Viši stručni saradnik za finansijsko računovodstvene poslove                          | Beznačajan rizik  |
| 22. | Glavni upravni inspektor  | Prihvatljiv rizik |
| 23. | Upravni inspektor   | Prihvatljiv rizik |
| 24. | Viši referent za informatiku  | Beznačajan rizik  |
| 25. | Viši referent - Tehnički sekretar   | Beznačajan rizik  |

- (2) Beznačajan rizik podrazumijeva da je rizik od povrede na radu, oštećenja zdravlja, profesionalnog oboljenja ili oboljenja u vezi sa radom zanemarljiv i da mjere zaštite nisu potrebne.
- (3) Prihvatljiv rizik podrazumijeva da je potrebno poboljšati zaštitu od povrede na radu, oštećenja zdravlja, profesionalnog oboljenja ili oboljenja u vezi sa radom, ako je moguće.

#### Član 8.

(Poslovi sa povećanim rizikom i poslovi na kojima se provodi mjera skraćivanja radnog vremena)

Kod Poslodavca nema poslova sa povećanim rizikom, niti poslova na kojima se provodi mjera skraćivanja radnog vremena.

### POGLAVLJE IV - PRAVILA PREVENCIJE I ZAŠTITE NA RADU

#### Član 9.

(Provođenje mjera prevencije i zaštite na radu)

- (1) Prilikom provođenja mjera zaštite na radu Poslodavac poštuje opšta načela prevencije propisana odredbama člana 21. Zakona o zaštiti na radu.
- (2) Poslodavac će radnika neposredno prije stupanja na rad, usmeno upoznati sa mjerama sigurnosti i zaštite na radu, a zaposlenu ženu za vrijeme trudnoće i dojenja kao i radnika sa promijenjenom radnom sposobnošću će obavijestiti pismenim putem.
- (3) Radnik ne može zasnovati radni odnos ukoliko prethodno nije utvrđeno da njegovo zdravstveno stanje i psihofizičke sposobnosti odgovaraju zahtjevima određenog radnog mjesta u skladu sa odredbama Zakona o zaštiti na radu i drugim uslovima utvrđenim Zakonom o državnoj službi u Kantonu Sarajevo ("Službene novine Kantona Sarajevo", br. 31/16 i 45/19) i Zakonom o namještenicima u organima državne službe u Federaciji Bosne i Hercegovine ("Službene novine Federacije BiH", br. 49/05 i 103/21), kao i drugim važećim propisima koji se odnose na zapošljavanje.
- (4) Mjere zaštite koje provodi Poslodavac neće prouzrokovati finansijske obaveze za radnike.

#### Član 10.

(Preventivne mjere)

- (1) Poslodavac osigurava slijedeće preventivne mjere radi zaštite života i zdravlja radnika:
- održavanje u ispravnom stanju i vršenje pregleda i ispitivanja sredstava za rad,
  - obezbjedivanje adekvatnih uslova radne okoline,
  - osposobljavanje radnika za siguran i zdrav rad,
  - obezbjedivanje sredstava i opreme za ličnu zaštitu na radu, njihovo održavanje u ispravnom stanju,
  - upućivanje radnika na sistematske preglede minimalno svake četiri godine kod specijaliste medicine rada,
  - upućivanje radnika na ciljani pregled u ovlaštenu zdravstvenu ustanovu ukoliko se ukaže potreba za tim.
- (2) Poslodavac jednom u dvije godine organizuje obuku i provjeru znanja radnika iz oblasti zaštite od požara u skladu sa odredbama Zakona o zaštiti od požara i vatrogastvu ("Službene novine Federacije BiH", br. 64/09).
- (3) Poslodavac će na mjestima rada istaći pisana uputstva koja se odnose na rizike po sigurnost i zdravlje sa zaštitnim i preventivnim mjerama koje se preduzimaju za otklanjanje ili smanjenje tih rizika, a u slučaju iznenadne opasnosti po život i zdravlje, takvo uputstvo se može dati i usmeno.

#### Član 11.

(Lična zaštitna oprema)

U skladu sa Aktom o procjeni rizika na radnim mjestima kod Poslodavca nije potrebno korištenje lične zaštitne opreme.

#### Član 12.

(Upotreba protivpožarnih aparata)

- (1) Stručna služba za zajedničke poslove radnicima obezbjeđuje upotrebu protivpožarnih aparata kao sredstava i opreme zaštite od požara.
- (2) Radnici u toku osposobljavanja za siguran i zdrav rad prolaze posebnu obuku o propisima iz oblasti zaštite od požara, kao i o načinu upotrebe i rukovanju protivpožarnim aparatima i evakuaciji u slučaju požara, kako je to propisano članom 10. stav (2) ovog pravilnika.
- (3) Stručna služba za zajedničke poslove osigurava da se protivpožarni aparati održavaju u ispravnom stanju.

#### Član 13.

(Periodični pregledi)

- (1) Poslodavac će vršiti slijedeće periodične preglede:
- preglede sredstava rada koja se prvi put puštaju u rad, a naredni pregledi i ispitivanja se vrše najmanje jednom u tri godine,
  - pregledi i ispitivanje električnih instalacija najmanje jednom u tri godine,
  - pregledi i ispitivanje gromobraskih instalacija na objektima najmanje jednom u dvije godine,
  - pregledi i ispitivanja fizičkih, hemijskih i bioloških štetnosti i mikroklimе u radnim i pomoćnim prostorijama u ljetnjem i zimskom periodu jednom u tri godine.
- (2) Periodičnim pregledima i ispitivanjima ne podliježu audio i video oprema, oprema za informacionu tehnologiju i uobičajena kancelarijska oprema.
- (3) Preglede iz stava (1) ovog člana Poslodavac vrši putem ovlaštene organizacije koja ima dozvolu Federalnog

ministarstva rada i socijalne politike za obavljanje tih poslova.

- (4) Periodični pregledi iz stava (1) ovog člana se vrše u skladu sa Zakonom o zaštiti na radu, Pravilnikom o načinu, postupku i rokovima vršenja periodičnih pregleda i ispitivanja iz oblasti zaštite na radu ("Službene novine Federacije BiH", br. 23/21) i drugim važećim propisima iz oblasti zaštite na radu, kao i propisima o standardizaciji u Bosni i Hercegovini, tehničkim propisima i uputstvima proizvođača.

#### Član 14.

##### (Osposobljavanje radnika)

Poslodavac će u skladu sa Zakonom o zaštiti na radu osposobiti radnike za siguran i zdrav rad, a poslove osposobljavanja povjerava ovlaštenoj organizaciji iz člana 64. Zakona o zaštiti na radu.

#### Član 15.

##### (Savjetovanje i uključivanje radnika)

Poslodavac se savjetuje sa radnicima i njihovim predstavnicima i omogućava im da učestvuju u raspravama o svim pitanjima u pogledu sigurnosti i zaštite zdravlja na radu, a posebno im omogućava da učestvuju u:

- raspravama i odobravanju svih mjera u pogledu sigurnosti i zaštite zdravlja na radu,
- svakoj mjeri koja može značajno uticati na sigurnost i zaštitu zdravlja na radu,
- imenovanju radnika koji će obavljati poslove vezane za obezbjeđenje zdravih i sigurnih uvjeta rada, prve pomoći, gašenje požara i evakuaciju radnika,
- angažovanju, tamo gdje je potrebno, ovlaštenih organizacija za zaštitu na radu,
- planiranju i organizovanju osposobljavanja radnika u oblasti zaštite na radu.

#### Član 16.

(Radnici za mjere prve pomoći, protivpožarne zaštite i evakuacije radnika)

- Poslodavac će radi provođenja odredbi člana 36. stav (1) Zakona o zaštiti na radu na mjestima rada u ul. Reisa Džemaludina Čauševića broj 1, i Obala Kulina bana broj 4, Sarajevo, imenovati radnike za mjere prve pomoći, protivpožarne zaštite i evakuacije radnika.
- Radnici za mjere prve pomoći, protivpožarne zaštite i evakuacije radnika će povodom pitanja vezanih za provođenje odredbi člana 36. stav (1) Zakona o zaštiti na radu saradivati sa Stručnom službom za zajedničke poslove u pitanjima koja spadaju u nadležnost te službe.

## POGLAVLJE V - OSTALE ODREDBE

#### Član 17.

##### (Obavještanje sindikata)

- Poslodavac najmanje dva puta godišnje obavještava Samostalni sindikat državnih službenika i namještenika Kantona Sarajevo kao i Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji Bosne i Hercegovine o rizicima po sigurnost i zdravlje i mjerama koje je preduzeo i koje planira da preduzme radi unapređivanja sigurnosti i zaštite zdravlja.
- Obavještenja iz stava (1) ovog člana dostavljaju se sindikatima do 31.07. za prvu polovinu tekuće godine i do 31.12. za drugu polovinu tekuće godine.
- Poslodavac će posebno obavijestiti i savjetovati se sa predstavnicima radnika i sa radnicima nakon smrtno,

grupne ili teške povrede na radu, utvrđenog slučaja profesionalnog oboljenja kao i u slučaju da nadležna inspekcija utvrdi nedostatak u primjeni mjera zaštite na radu.

#### Član 18.

##### (Vođenje evidencija)

Poslodavac vodi evidenciju o:

- provjeri znanja radnika iz oblasti sigurnosti i zaštite na radu,
- održanim obukama o propisima iz oblasti zaštite od požara,
- izvršenim pregledima i ispitivanjima radne sredine i sredstava za rad,
- povredama na radu, profesionalnim oboljenjima, smrtnim slučajevima i njihovim uzrocima,
- ljekarskim pregledima radnika.

#### Član 19.

##### (Sadržaj evidencija)

Evidencije iz člana 18. ovog pravilnika sadrže slijedeće podatke:

- evidencija o provjeri znanja radnika iz oblasti sigurnosti i zaštite na radu sadrži ime i prezime i naziv radnog mjesta radnika, podatke o ovlaštenoj organizaciji i licu koje pruža obuku, datum obuke i provjere znanja, kratak opis sadržaja obuke, napomenu o ishodu provjere znanja kao i druge eventualne napomene,
- evidencija o održanim obukama o propisima iz oblasti zaštite od požara sadrži ime i prezime i naziv radnog mjesta radnika, podatke o ovlaštenoj organizaciji i licu koje pruža obuku, datum obuke i provjere znanja, kratak opis sadržaja obuke, napomenu o ishodu provjere znanja kao i druge eventualne napomene od značaja,
- evidencija o izvršenim pregledima i ispitivanjima radne sredine i sredstava za rad sadrži napomenu o objektu u kojem su vršeni pregledi i ispitivanja, kratak opis radne ili pomoćne prostorije za koju je vršen pregled (broj sprata, broj prostorije, kvadratura i eventualni šematski prikaz pozicije prostorije), podatke o ispitanom sredstvu rada, podatke o ovlaštenoj organizaciji koja vrši preglede i ispitivanja, podatke o rezultatima pregleda i ispitivanja, i eventualnim predloženim mjerama za poboljšanje uslova rada, kao i druge eventualne napomene od značaja,
- evidencija o povredama na radu, profesionalnim oboljenjima, smrtnim slučajevima i njihovim uzrocima sadrži podatke o radniku, kratak opis povrede, profesionalnog oboljenja ili smrtnog slučaja, težinu povrede (lakša, teža, smrtni slučaj), datum i vrijeme nastanka povrede, uzrok povrede, profesionalnog oboljenja ili smrtnog slučaja, podatke o mjerama preduzetim radi otklanjanja rizika, odnosno uzroka nastanka povrede, profesionalnog oboljenja ili smrtnog slučaja, podatak o dužini trajanja privremene spriječenosti za rad, kao i druge eventualne napomene od značaja,
- evidencija o ljekarskim pregledima radnika sadrži ime i prezime i naziv radnog mjesta radnika, podatke o ovlaštenoj zdravstvenoj ustanovi koje je izvršila ljekarski pregled, datum ljekarskog pregleda, podatke o utvrđenoj radnoj sposobnosti i

eventualnom profesionalnom oboljenju ili invalidnosti, kao i druge eventualne napomene od značaja.

Član 20.

(Dostavljanje izvještaja o povredi na radu i profesionalnom oboljenju)

- (1) Poslodavac će dostaviti izvještaj o povredi na radu koja se dogodi i profesionalnom oboljenju koje nastane na radnom mjestu, radniku koji je pretrpio povredu, odnosno kod kojeg je nastalo oboljenje, nadležnom zavodu zdravstvenog osiguranja kod kojeg je radnik zdravstveno osiguran, kao i nadležnoj inspekciji rada, u roku od sedam dana od dana pretrpljene povrede odnosno nastanka oboljenja.
- (2) Izvještaj iz stava (1) ovog člana podnosi se na obrascu čiji sadržaj i način podnošenja propisan Pravilnikom o sadržaju i načinu podnošenja izvještaja o povredi na radu i profesionalnoj bolesti ("Službene novine Kantona Sarajevo", broj 9/23).

Član 21.

(Obaveza obavještanja inspekcije rada)

- (1) O svakom smrtnom slučaju, težoj povredi na radu, profesionalnom oboljenju i svakoj pojavi koja bi mogla ugroziti život ili zdravlje radnika na radu Poslodavac će odmah obavijestiti Kantonalnu upravu za inspeksijske poslove - Inspektorat rada, zaštite na radu i socijalne zaštite.
- (2) Za svaku povredu na radu Poslodavac je dužan na uviđaj pozvati neposrednog rukovodioca povrijeđenog radnika.

**POGLAVLJE VI - PRIJELAZNE I ZAVRŠNE ODREDBE**

Član 22.

(Primjena propisa)

Na sva pitanja koja nisu regulisana odredbama ovog pravilnika, primjenjuju se važeći propisi koji se odnose na zaštitu na radu.

Član 23.

(Izmjene i dopune pravilnika)

Poslodavac će pristupiti izmjenama i dopunama Akta o procjeni rizika i ovog pravilnika u slučajevima propisanim Zakonom o zaštiti na radu i Pravilima o procjeni rizika.

Član 24.

(Stupanje na snagu)

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 03-02-31971/24

02. septembra 2024. godine  
Sarajevo

Ministrica  
**Darja Softić Kadenić**, s. r.